

**Uunga siunnersuut: Aatsitassat pillugit ingerlatallu tamatumunnga pingaarutillit pillugit Inatsisartut inatsisaat nr. 7, 7. december 2009-meersup allanngortinnissaa pillugu Inatsisartut inatsisaat nr. xx, xx. xxxx-imeersoq (aatsitassanut inatsit)**  
(Inuusutissarsiornermut Aatsitassaqaqarnermullu Naalakkersuisoq)

**Saqqummiussinermut allakkiaq**  
(Inuusutissarsiornermut Aatsitassaqaqarnermullu Naalakkersuisoq)

### **Siullermeenera**

Matumuuna aatsitassanut inatsisip allanngortinnissaanut siunnersuut saqqummiutissavara.

Aatsitassanik suliniutinut arlalinnut atatillugu innuttaasut ilanngunneqarnissaat aammalu innuttaasunik ilanngussinerup pitsaasup suunera, kiisalu qaqugukkut innuttaasut ilanngunneqarneri naammattuusut piviusuusullu pisarneri pillugit annertuumik oqallittoqarsimavoq.

Nunatsinni aatsitassanik suliaqaqarnerit annertusineri ukiuni takkuttussani takussavagut, Kalaallit Nunaannilu tamarmi innuttaasut, ingammillu sumiiffinni suliaqaqarnermik takkuttussanit immikkut ittumik eqqugaasuni innuttaasut tamakku pillugit ilisimatinneqarlutillu suliniutinik paasisaqarnissaat Naalakkersuisut kissaatigalugillu anguniagaraat.

Tusarniaassutigeriikkatut aatsitassanik suliaqaqarnernut atatillugu innuttaasunik ilanngussuinerit tusarniaanerillu ingerlalluarsimapput, siunnersuummilli matuminnga innuttaasunut suliniummut isummernissaminut sumi qaqugulu periarfissaqarnissaminik erseqqissarniarlugu kikkunnik tamanik siusissukkut ilanngussuinissamut aatsitassanut inatsimmi sinaakutissanik, kiisalu aatsitassanik suliniutinut atatillugu tamanut ammasumik tusarniaatitsisarnernut sinaakutissanik aalajangiusseqqinnissamut siunnersuutikkut matumuuna Naalakkersuisut kissaateqarput.

Siunnersuut tusarniaanerup ingerlanneqartarnera pillugu annertunerusumik erseqqissaanermik pilersitsissaaq, taamaalillunilu pisortani oqartussaasuni, suliniutinik ingerlatseqatigiiffinni aamma innuttaasuni tusarniaanerit suliaralugillu ingerlattarnerinik siuarsaassalluni.

Siunnersuut annertuumik Kalaallit Nunaanni atuuttutut periutsimut tunngaveqarpoq, aammattaarli Danmarkimit aammalu Canadami provinsini Newfoundlandimi Labradorimilu

inatsisaasunit periusaasunillu isumassarsiortoqarsimavoq. Sioqqutsisumik tusarniaatitsisarnerup atuutsilernerani suliniummi siusissukkut ingerlassanit piviusutut aatsitassarsiormik suliniutit pilersarusiornerini, isumassarsianik katersuinerit allanguutissatullu siunnersuuteqarnerit siunertaralugit oqaaseqaatigineqarnissaanut saqqummiunneqarnerisigut innuttaasut annertunerusumik sunniuteqartarnerisa isumannaarnissaat siunnersuutip erseqqissassavai.

Siunnersuutip akuersissutigineqarneratigut nunani taakkunani, aammattaarli sumiiffiit ilaanni pitsaatigisumik innuttaasunik ilanngussuinnarata pitsaanerusumik peqalissaagut.

Innuttaasunik ilanngussuinnernut sinaakktissat saniatigut aamma Naalakkersuisut siunnersuutigaat aatsitassarsiormik suliniummut atatillugu ingerlassami siusissukkut ingerlatseqatigiffiit suliniummut nassuiaasiortassasut, kikkut tamarmik ilanngunneqarnerisat nukittorsaqqinniarlugu, aammalu sapinngisamik siusissukkut suliniummik sunniuteqartitsisinnaaniarluni, aammattaarlu atugassiani saqqummiunneqartuni ilanngussanut assigiinngitsunut tunngatillugu misissuinissamut aamma immikkut ilisimasalinnit naliliissutinik pissarsiornissamut soqutigisaqaqatigiit aningaasanik qinnuteqarfigninnaasaannik aningaasaateqarfiliortoqassasoq.

Aatsitassarsiormik suliniutinut atatillugu innuttaasunik ilanngussuinnerunissaq pillugu Naalakkersuisut anguniagaannik siunnersuut ataatsimoortumik tapersersuisuuvoq.

Taamatut oqaaseqarlunga oqallilluartoqassasoq kissaatigaara.